

INUIT ATAQATIGIIT

INATSISARTUNI



UKA 2013/34

6. november 2013

Aqqaluaq B. Egede

Inissianik attartortut piffissaq eqqorlugu akiliuteqartartut siunissami attartortutut akiliineq ajortunut akiliussisarnerannik aningaasartuutinullu taakku akilinngisaannik akiliisarnerannik pisussaaffeerullugit, inissianik akiliutit aalajangersarneqartarnerat pillugu maleruagassanut atuuttunut Naalakkersuisut allannguutissaannik siunnersuusiorissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Kim Kielsen, Siumut)

Inuit Ataqatigiit pingaartipparput inuaqatigiinni atukkat aamma inuit ataasiakkaat qanoq aningaasartuuteqariaasiannut tunngassuteqartut tamarmik misissuiffigineqarnissaat. Atugarissaarneq aningaasaannarmik oqimalutarneqarsinnaanngikkaluartoq ilisimavarput nunatsinni inuit atugarissaarnerat aningaasatigut pisussaaffeqarnikkut annertuumik sunnersimaneqartoq.

Taamaammat siunnersuut una inatsisartut ataatsimiitaliaanni misissuilluta suleqatigiinnissatsinnik periarfissisoq iluarismaarpalput. Inuit Ataqatigiit pisariaqartipparput isertitakitsut, akunnattumik isertitallit aammalu isertitaqortuut immikkoortillugit akiliussisariaqarnermik eqqorneqakulanerpaat kikkuunersut misissuisoqassasoq.

Siunnersuut akuerineqassappat, ullumikkut inimik attartortut akiliinngitsoorsimasut akiliunneqartarnerat qanoq piisanersoq aamma aamma ineqartut allat akiliisassanngippata akiliisussaq alla inissiniartariaqarpoq.

Paasisariaqarparput inuit ukiumut qanoq isertitallit akiliingitsoornissamik eqqukulaneqarnerpaajunersut. Siunnersuutip matuma isummerfigineqarnissaal nalorninartooqunagu pisariaqarmat erseqqissumik paassisallugu ajornartorsiutip inuaqatigiinni qanoq atugaqartut ajornartorsiuteqarfiginerpaaneraat.

Amma pisariaqartutut isigaarput isumaginninnermi inatsit aqqutigalugu inuit ikiorserneqartussat immikkut akiliunneqartussaasut immikkut misissuiffigineqarnissaat. Qulakkeerneqartariaqarpoq isumaginninnermut inatsit aqqutigalugu ikiorserneqartussat akiliinngitsoornerat ineqartunut allanut akiligassiinermik malitseqartarsimanersoq.

Inuit Ataqatigiit ataatsimiitaliamut kaammattuutigissavarput misissuinerminni ilaatisagaat ajornartorsiut pineqartoq nunatsinni sumi nalaanneqakkajunnerpaajunersoq.

Inuit Ataqatigiit takisuuliornata siunnersuut suleqataaffigissallugu soqtiginartitarput ataatsimiitaliami susassaqartumi suliarineqarnissaai inassutigalugu siunnersuutip siulermeerneqarnerani akuerineqassasoq inassutigaarput.